



焦太史編輯國朝獻徵錄卷之八十四目錄

浙江一

布政使

梁燾

陳煒

端宏

李贊

陳仁

王尚綱

張芹

留志淑

叅政

林瑜

劉安

周旭鑑

張穆

陸容

楊奇

陸鰲

叅議

徐瑤

符觀

按察使

王良

周志新

陳璇

楊瑄

王之猷

副使

張和

張文

陶成

閻睿

高貫

李熙

曹時中

兄泰附

王冀

閻溥

僉事

王濂

劉宜正

劉丞直

蔡楫

鄭建

和維

皇甫濤

知事

焦太史編輯國朝獻徵錄卷之八十四

浙江一

正奉大夫浙江布政使司左布政使梁公葵墓

志銘

魏 驥

正奉大夫浙江布政使司左布政使泰和梁公享年七十卒於位公名葵字叔車別號松軒而梁實泰和右族世以詩書禮義是務子孫或顯或隱代有其人公自幼承家學之懿端重不凡有相者見之指公謂其祖畦樂先生曰是兒他日貴不可言宜善撫之與兄果業舉子兄弟互爲師友業殊有造應秋試兄弟

皆捷公尋中進士第授刑部主事未幾陞員外郎時
尚書魏源性嚴毅人莫敢近獨公過獄有疑者能與
之辯不歸於至當不已若蘇民倪阿雙坐同謀殺人
稱寃在獄二十五年經十三司不能決部特委公公
取成案閱其所犯坐減死出是公名大著陞廣西按
察司副使兩考陞廣西布政司右布政使一日他所
洞蠻入柳州界劫掠人民男女官軍追及之以所掠
男女悉殺之以要功公知之謂其首帥曰今後官軍
但得被掠男女一人生者准功一級自是男女得生
者莫計其數田州土官岑鑑兄弟互相讐殺經年不

解時都御史馬公鎮守其地謂公曰此事非公往論
欲其一家帖服不能公遂行旣至曉以大義泊申朝
廷之大法二人卽叩首曰不敢不奉教卽帖然服公
還二家各以黃白金其數不尠爲謝公悉却之曰得
爾兄弟和氣如初尊奉朝廷卽是我受惠也及一女
土官梗化公與巡按御史侯爵偕行處治侯以風紀
律之其徒擁衆咆哮不服公起叱之退徐徐以禮法
曉之衆皆叩首曰唯公之教是遵不敢更犯違天憲
侯曰公何以得其心如此殆昔人所謂小范老子胸
中有數萬甲兵者邪又兩考陞浙江布政司左布政

使公至不動聲色惟廉惟謹以率之卒致貪廉薄敦
利興害除俾一方老幼仰之如神明尊之如父母追
述職 上賜宴禮部及賜襲衣既歸公以廣西與浙
江所歷任歲月通理九載赴吏部併陳年已七十乞
致仕部以公年雖七十精力未衰以 聞上命復職
至官感疾而卒高祖才可曾祖彥卿祖不移別號哇
樂多才多學鄉里恒尊稱之曰哇樂先生父用之別
號泊菴累官翰林侍講春坊贊善其平生著作有泊
菴集行於世公之爲政蓋多本之學問寬不失縱仁
不失柔威懷並著殊得政體狀謂其外和而內剛方
寸之間光輝明白信夫

浙江等處承宣布政使司左布政使耻菴陳公

煒墓志銘

彭 韶

成化甲辰八月十六日江西布政司右布政使陳公
以疾卒於官公陳姓諱煒字文曜號耻菴福州閩縣
人先世衣冠文物著於閩具載考翰林侍讀綱齋先
生墓志綱齋元配林夫人無子繼林安人以宣德庚
戌八月十七日生公資稟秀朗聰悟過人甫十歲失
怙知力學年十八舉正統丁卯鄉薦景泰甲戌會試
中甲榜以疾未廷對奔嫡母喪歸嫡母惟一女嫁已
久公盡出母所遺衣物付之曰懯吾母於地下天順

庚辰始赴廷對賜進士例遣歸待次至臨清覆舟溺
子女不行寓教山東如御史高唐劉魁輩皆出門下
未幾取回京明年選理刑又明年拜河南道監察御
史錦衣衛有都指揮自英廟時得幸連起大獄陷
無辜公與同官疏其奸利謫戍嶺表中外快之南京
給事中王徽等劾內閣臣黨立廢后事調遠州公草
疏請復其官以旌直臣不報尋差巡按蘇松常鎮四
郡歲連歉荒甚亟命有司發廩十萬以賑諸漕卒遇
造舟預以月糧錢質於富室充費而日無升斗之食
公爲會其月日平其子本約歲有七月糧悉以還士

卒上海民婦與私夫逃其父慙謀殺丐女衣以婦衣
沉之江月餘形變則誣婦翁因姦殺其女婦翁無以
自明引伏公疑令人蹤跡之果得之蕪湖巨室於是
坐婦父以死移北直隸提調學校公嚴章程勤課試
而歸重名檢學官黜者餘二十人士子汰者餘四千
人復以生員舊例充吏適中不學士子計特奏寢之
成化庚寅陞江西按察司副使福清商十三人見殺
於石城民斂貲而燬其尸久不得主名公廉知爲潘
氏亟捕至伏法藩司因盜越獄罪獄卒以故縱者二
十七人公以一盜逃而死典守二十餘人法太峻減

論以徒甲午陞本司按察使不事刑而風稜自著上
杭富商林眷遣孥王氏等歸家至番陽湖同舟人夜
投十餘人於水而取其貨王氏墮水不沒浮三十里
得出訴於公乃戒邏吏物色之至撫州掩捕焉賊盡
獲盜無一人免者臨川人陳季宏搆民王華一爲軍
縣捕之急華一潛殺繼父白文質誣季宏因捕毆死
獄數年不決公疑之詢知文質有幼婦吳氏逮之至
具得華一殺文質狀季宏得不死歲嘗早甚公禱有
雨旣而有芝生後堂柱衆以爲瑞公曰此歲豐人和
之兆於我何有哉吏部連薦爲浙江廣東左布政使
皆不果而公又丁母安人憂去官旣葬闢祠堂定祭
禮立家規且荆齋心樓以淑子姪杜門不出有終焉
之志適江憲缺使吏部亟以公補之公不得已至官
持已愈嚴馭吏愈峻而治獄愈力吏民益畏愛之朱
子語類久不傳不憚勞費爲板行於世吏部復以湖
廣左布政使薦又不果明年乃陞江西右布政使公
不以正官自逸猶隨牒分守於外弋陽樂平二邑有
溪介其間樂平民陂以溉田弋陽民輒潰之彼此鬪
訟積不相能公躬履其地見陂可溉田萬餘畝而爲
弋陽患纔二十而一遂屬二邑民諭之俾樂平民仍

陂水行漑而倍償弋陽患水之田并貸其徭賦民皆樂從新昌民陳守訓者力貧耕讀爲書良善之家四字旌焉蓋凡賦政之餘有可以勸善懲惡興學下士者無所不用其心其風操之厲不減於持憲日也兩廣總督都御史乏人廷議推公雖俞旨未下士大夫咸色喜已而有浙江左布政使之擢而公不及見矣公爲人志高行卓一於正而不苟靜重整暇有澄不清撓不濁器度義所激則勇爲之至人情世務極其纖悉能知人邪正考其人終身不爽妙翰墨善吟咏片言隻字爲人寶惜聚書且萬卷手披口諷非有事未嘗一日舍去爲文章典重有體恬退之操尤所雅尚自爲御史爲藩憲正佐無一官不以親老乞休致焉請疏或連歲上顧遭時貪賢尚德曾不少副公志而公於親終益以規退爲事然終不可得復繪深衣幅巾行樂小影自題以見志云

浙江左布政端宏傳

郡志

端宏字仲仁號垣齋當塗人景泰癸酉領鄉薦登壬
順丁丑進士庚辰授浙江道監察御史巡捕通州東
昌等處德威兼濟所至盜息民安歷巡按雲南河南
廣西咸有風裁豁洞蠻僚寇邊時征討官軍僅撫定
其酋首而其下猶有肆剽斂以厲民者總帥輒以地
方寧靖上聞公劾其妄復下令選將練兵豐食設險
以爲攻守久遠之計由是諸孽望風附義陞陝西按
察司副使歸省涉江中流颶風大作幾覆舟人皆錯
愕公泰然曰吾生平未嘗行一不義今反已何懼俄

而風果息丁內外艱改官兩浙陞山東按察使浙江
左布政使浙人聞公還鼓舞歡動如市乃益篤忠貞
修職業人咸樂其長厚丁未謝事非公事足跡不至
公門乙卯卒於家子文贊文輝文用

浙江布政使司左布政使李君贊墓表

楊一清

正德壬申夏四月六日通奉大夫浙江等處承宣布
政使司左布政使致仕李君惟誠卒于家其弟都察
院右副都御史惟正具事狀請予表其墓君諱贊惟
誠其字別號平軒出唐西平忠武王後裔忠武生憲
嶺南節度使節度生浙爲袁州刺史因家宜春南唐
時再徙吉水其傳至于子敏國初始徙蕪湖家焉君
之曾大父也大父隱不仕父爲諸暨縣學訓導俱以
君貴累贈通議大夫都察院右副都御史君爲仲子

少穎脫儕輩長遊邑庠與惟正並有聲江東成化庚子鄉試甲辰會試入奉廷對賜二甲進士兄弟齊名人以爲美談丙午授吏部文選主事弘治改元轉考功員外郎爲太宰王端毅公所器重以母淑人喪歸服闋改兵部武選員外郎進車駕郎中順天民地多併入勢家而牧馬獨以丁口計民坐是困大司馬馬端肅公疏君理其事君勾稽有法盡復民業中間補截調停曲中機宜民至于今便之久之改武選庚申詔大臣各舉其屬可任方面者馬公以君薦遂擢陝西布政使司左叅政嘗攝司篆提調鄉闈清理戎牒務持大體不屑爲煩苛三載考績遷浙江右布政使尋轉左浙俗侈靡君教之敦本實崇儉樸歲饑躬歷郡邑蠲逋負發倉廩拊問存恤所全活甚多屬道瑾專橫籍故錢都御史家君憐其非辜語輒泣下所以調護之者無遺力瑾聞而銜之或風以自免計君不聽會吏部擬君遷太僕卿瑾勒令致仕杭之老稚遮道泣留不得至留其一履以志思君性寬簡與人處洞見肺肝不爲逆億或已負亦不之較其爲政稱是未嘗沽赫赫之名去則有遺愛焉詩文清逸疎鬯類其爲人草書道勁得蘇長公筆意旣解官歸日與故

舊賓客徜徉采石山水間每飲輒醉醉則賦詩更相
觴詠盡興而返若是者凡三年年六十卒

浙江布政使司右布政使陳公仁墓志銘

林俊

陳公子居諱仁自號三渠居錦墩揖壺山爲勝一時
羣從第進士成化戊戌庶吉士邦瑞公始之丁未公
繼之己未今憲副邦器又繼之初公在諸生與陳大
叅寒月稱二陳寒月性敏公矯情爲勤資深而輔之
博爲任提學所獨賞果發解首寒月名第二中進士
爲戶部主事採輯實錄東廣督軍餉淮南兩以郎中
吳宜人憂讀禮廬次引渠鑿池與鄉族同其利再爲
主事爲員外郎郎中畢力問學作古文詞自潤而國

計明習不腐不漏不啗嘿自容隨俗養交取巧化大
僚大章奏多出其手闕里災公疏重修省闕異端抑
奔競禁奢侈振士風收人心端教化正風俗禮部災
疏早朝勤政審決章奏訓養東宮進君子退小人節
齋醮嚴備邊又疏雪冤獄紓忠憤罷江南織造復御
史彭程官給事中林廷玉補外勿遣又疏致仕布政
使林同蔣雲漢方守知府潘琴宜優異妖僧領占竹
資緣內降宜勿取陝西守臣進古璽又疏其僞且謂
果秦璽亦亡國廢物宜毀勿留皆關切時諱朝紳爲
動容 孝廟多所嘉納今 上初司徒韓公文倡伏

闕請誅雙闕鼓怒逆瑾中之力文致公公誤落三官
并落韓公以去公同知鈞州再知汝州轉南京兵部
員外郎掌武學方是時政如束濕諸司易守爲全身
遠害之計公委而任之以無失故常瑾誅起浙江提
學按察副使權量精審公案手自披閱不付吏積勞
成損轉爲其藩叅政疾已作尋起尋復旣之哭內氏
李宜人又復疏乞休致吏部錄賢勞擬進其藩右布
政使致仕命下公卒已彌月正德甲戌三月十七日
也壽六十一所著三渠稿天津志行於時

浙江右布政使王公尚綱傳略

朱睦㮮

王尚綱字錦夫，郟縣人也。弘治十五年進士，除兵部職方司主事。明年，羅父憂。正德三年，調吏部稽勲。四年，陞驗封員外郎。尋遷稽勲郎中。尚綱在郎署，藻鑒清明，臧否人物，賢者即毀，不得而奪其美；不肖者即譽，不得而益其能。其大有裨於銓衡也。類此七年，出補山西布政司左叅政。尚綱以大母李母聶俱垂老，不能迎養，乃引疾還。十三年，以原官調四川。尚綱封還部檄，不起。安處衡門，以明退素，俯視囂世，一塵不營。時乘驢出遊，扈澗、蒼山，或及暮而返，或數日乃歸。

人亦不之異亦莫之知也又開渴睡洞以澄清神惡
構馬牛亭以遣除世慮築讀書臺以尚友古人游心
於天地萬物之表而莫之與競也尚綱歸十有七年
其知而薦者累二十餘疏嘉靖初上搜訪遺逸復
除陝西左叅政尚綱不得已而往再遷浙江右布政
使逾年卒於官年五十四有集十二卷刻於家尚綱
既卒撫按乃建祠於蒼山之麓以祀之

浙江布政使司右布政使張公芹墓志銘

羅洪先

正德初韓忠定率部院大臣伏闕請誅近闈八黨當
是時武皇帝將行遣輔臣有狎於闈者密泄之竟
敗計不四年而閹瑾之禍徧天下及瑾誅輔臣又將
論功廢子南京監察御史張公聞之上疏曰李某者
顧命大臣當與陛下同休戚者也方劉瑾亂政既
不能防微杜漸又不能力與之爭顧降禮屈辱且爲
草制語極褒美遂使驕橫恣肆荼毒天下其罪已不
可贖乃冒他人功受恩賞他日何以見先帝哉竊

見國家大臣正直者多不容於瑾方得志之時奸邪者多見黜於瑾已伏誅之後惟某始終無恙臣不知其何善爲身謀若此也疏入輔臣持之涕泣不能辨天下一日知有張御史慕其人必以爲雄傑偉特性梗棘不可近余見其退休時恂恂儒生布素徒步道遇之不知其爲貴人方欲相從問當時忠定伏闕始末與正德間諸大政事以補史官之缺不一再見卒矣悲夫公名芹字文林世居新淦之峽江後析地今爲峽江縣人父某歲貢爲蒲臺教諭以公貴封御史公爲諸生博學有時名弘治戊午舉鄉試壬戌第進

士授福州推官以薦召爲御史出知徽州府宸濠

言者過計恐脇公家取道于徽請改杭州公方誓死

守要害斬賊間謀命下乃去已而當道因徽人之思

復遣還郡又謂宜於杭自徵陞浙江按察副使巡視

海道進布政司右叅政終右布政在官餘二十年所

至皆有可述初爲福州習吏事嘗奉檄訊縣尉獄尉

貪而昵於清戎御史御史右之不爲聽按閩者數論

薦之及爲御史論輔臣禍且不測會都御史林公俊

亦自蜀上疏論時事俱得削俸於是益感激自效當

屬草未嘗一遜人其採寶明諫馳馬兩事尤爲人所

誦竇明刑科給事中也常以言下獄公論抹有言曰
言官天子耳目也善遇之人人思奮而蹇諤之風起
不善遇之則人人畏避而循默之風成自古治亂興
廢之驗莫不由此頃歲賊瑾陰懷異志挫辱言官寘
之極典以箝制人使不敢發其奸惡卒之禍亂相尋
幾危社稷可懼也今瑾誅矣然羣盜未平災異迭見
雖夙夜憂皇孜孜求言猶恐不及柰何復有此舉動
哉其言懇切宛致明竟以是得釋 武皇帝好禁中
馳馬射獵嘗墮馬病諫者數人重得罪公聞之謂同
列曰彼不以諫名且爾吾何所委乎遂切諫曰孟子

言從獸無厭謂之荒老聃曰馳騁田獵令人心狂心
狂志荒何事不忘皆甚言無益有害也且備不虞猶
懼有患柰何乘危冒險輕萬乘之尊乎況 皇嗣未
誕萬一不諱如宗廟社稷何疏上罰止削俸自此兩
疏入人愈重之自巡按鳳陽補徽郡能以簡朴爲政
比改杭適 武皇帝南巡使符絡繹在道道必出杭
諸郡縣皆坐困而公無假借杭民又稱便自如杭徽
人泣送如父母已而復徽徽喜其來杭病其去及爲
憲副杭私喜猶夫徽徽之慕加於昔也公在海道倭
人爭貢寧波城下誤傷居民事旋定公且去爲叅政

擢右轄當道責其失策竟坐罷公性至孝善事繼母
廖在杭屢乞終養不許及去官垂老矣聞廖怒卽長
跪闕外不命之起不敢起廖卒哭奠三年不以病廢
家居絕泛交無公府之謁臬枹蔬食儉以終其身又
嘗考靖難諸君逸事人爲之傳於乎昔之侃而直者
出於性成亦有所慕乎公生正統丙戌某月某日沒
嘉靖辛丑七月某日年七十有六沒之明年徽人都
御史汪公玄錫追慕之致祠而碑其墓提學憲副蘇
公佑檄有司歲時禮于鄉賢祠中

浙江布政司右布政使留公志淑墓志銘

徐問

方伯留公以嘉靖壬辰秋八月卒公諱志淑字克全
別號朋山其先由浙入閩居永春始祖從効值五季
亂以忠勇爲衆心所推漳泉二州之民咸趨附焉宋
興舉二州內屬遂命節鎮清源封鄂國公六傳而至
留正事光宗以相業著封秦國公諡忠宣忠宣徙晉
江其伯兄奉祠事于永春是爲公小宗之祖也無何
亦載主居晉自宋亡元據迄於我朝留氏功臣地
宅墳墓獨冠於泉七傳至公曾大父諱孟遜大父諱

昆父諱芳舉鄉貢通判南雄考績雅退不復出公十六遊蔡虛齋之門一見稱其遠器十八卯角以儒士領弘治戊午鄉薦壬戌舉禮部會試奔母黃氏喪歸服闋登乙丑進士授温州府推官小心精白綜核吏事三年以異政聞召爲刑部主事遷員外郎郎中錄囚畿內平反甚衆以才望推守杭州至則詰姦理枉厚本節浮作士氣均糧役平物直禁和買杭人翕然稱良焉先是杭當要衝王人使客絡繹交道有司濫取曲承以希延譽鎮守織舶中官相繼漁獵數十爪牙旁午入郡如虎狼公一切裁正或寘之法鎮守恚

欲乘相見倨挫之公簡執不爲屈已卯代鎮爲畢真逆濠黨也至自江西聲勢翕赫擁從牙士五百餘人肆行殘賊人人自危公密得其不可測之狀白臺察監司陰制之未幾真果構市人一夕火其居延燒二千餘家公恐其因衆以爲亂閉門不出止傳報諸衙門人母救火餘數日果與濠通變真將發應濠臺察監司召公定計先提民兵伏真門外監司以常禮見出公入真怒曰知府以我反乎公應曰府中役從太多是以公心跡不白因目左右出報監司旣入卽自上堂執真手與語當自白之狀衆共語遣所不藉之

人以釋衆疑真倉卒不得已呼其衆出出則民兵盡
執而置之獄俄與真人視府中見所藏諸兵器詰曰
此將何爲也真不能答乃羈留之踰月上得奏狀繫
真入京伏誅其有膽略知慮動合機宜類此時濠變
方起人情詢詢以爲必取水道及南京 武廟親率
師討之憲臣以徽爲噤喉地行在供億胥此焉辦乃
便宜表公知徽州報至卽出篆簿帑藏餘八千金人
始知公真清白吏也杭民老幼攀留塞道有垂涕者
至徽止預接駕丁夫餘悉如故公私晏然徽俗尚氣
節訟案滯累年公剖析如流獄訟衰息凡公帑羨餘

悉出糴穀備賑或新學校及諸祭器節孝諸坊時去
杭踰年人思公白當道復之徽人則請留之臺察以
聞竟從杭請徽人之送公也猶杭人焉未幾遷湖廣
按察司副使尋轉布政司叅政到處焚錯迎解銅盤
嶺洞賊起公捕之先廉獲土民爲藏匿若干人凡報
賊者輒弗令返繇是消息不通乃令各村富民集兵
以待麾指運用莫測分道直迫賊壘而猶不知月餘
外給不繼賊始困公又使人善諭之遂降乃下令官
兵任取金帛籍餘資于官者數萬功旣上僅受次賞
會大饑多方講求事宜置斂散法極貧賑米次賑錢

次轉貸節役蠲稅民多賴焉屬有腴田數百頃水決
爲陂塘歲比不登公白臺察出所籍銅盤洞金以資
費度勢而疏導之爲斜堤植柳以遏水勢不二年田
有秋丙戌以親老疏乞歸不報旣而父訃至夕聞明
發抵家哭踊骨立服闋轉浙江按察使風聲凜如未
幾又聞大父訃承重奔喪服闋壬辰春正月報補江
西按察使逾月轉浙江右布政使數日疾作且篤遺
書子弟曰吾四弟僅一女不可使無後以吾三子元
徽繼之書畢遂歿是爲壬辰八月二十有八日也年
五十有二公平居天性和易舉動開豁事繼母胡克
孝與其弟志及志憲怡然友愛凡先人所遺悉以推
與志及挈其子元復輩扶柩江西藩臬諸司賻奠數
百金悉辭不受督學潘君移文獎之蓋足增化者之
光云

浙江布政使司左叅政林公瑜墓志銘

楊士奇

前浙江布政使司左叅政林公諱瑜字子潤漳之龍
嵒人其先出晉拒遠將軍晉安郡王祿之後而居泉
之龍潯世業儒宋慶元中有諱起東者始徙龍嵒再
世至鳳公之高祖也曾祖詔承直郎龍嵒縣丞祖宜
慶元以明經爲南靖縣學教諭自出貲作先聖廟不
以勤衆考德元季寇亂有保禦功分省承制授長泰
縣簿復授百夫長皆以母老辭娶黃氏生五子其五
公也自少有志於學洪武中爲太學生居太學五年

擢五軍斷事中司稽禮又六年陞右斷事公居官以忠愛爲本於議獄多所平反數月陞江西按察司僉事授奉議大夫陞奉政大夫行部過贛有姪殺其伯母者獄已具公聽其辭而加察焉實豪民索逋不得擊殺之而以賄移于其姪竟坐豪民而釋其姪安福有強盜數十人郡縣連歲捕不獲給事中及三司奉詔發兵捕之而不急捕盜更聽姦民悉取民之富者誣以匿盜非法拷掠備極楚毒富民不能勝領重賂乃得釋旣又及平民盜以是遂逸去而平民不問貧富悉困矣奉詔者旣以罪去而公代盜悉得而民若不知者公和厚樂易待物以誠用法持平恕臨政務寬簡所至禮賢下士考閱諸生而獎勸之歷三考以最陞本司副使授中順大夫流民聚長沙爲寇與袁接境朝廷命豐城侯總湖廣江西兵擊捕之總兵檄公招撫脅從者多歸焉渠魁旣得餘黨復叛公復往撫之遂以無事嘗督造戰衣一百萬期三月完如期而集又從工部尚書宋公採宮殿材于蜀而公分往馬湖極險之地事集而民不病蓋公于使人必酌其力體其勞而善撫之初自蜀歸有重獄二六餘人疑未決公立直之又三考當去於是居江西二十餘年

矣前所未有民者耄三百餘人遮馬首羅拜曰公厚
德被我民久矣民何以能忘公今決去不留其何以
慰民之思也相挽公足出一履競取之公乃得拍馬
馳去以最陞浙江布政使司左叅政浙江素繁劇時
布政使以下員皆缺公至獨任早夜躬勤不少懈踰
年吏舍夜火延燬公署及文書事聞并逮公請秋官
公輒引服不自辯未奏以疾卒永樂二十一年正月
朔也公在官二十年祿入益厚而自處泊然不加布
素時平居教子嘗舉汪信民菜根之言曰此立身之
要也諸子日務於學則訓之曰學以明善其身而達
于用文辭非所急也公間爲詩文未嘗存稿言書法
輒亦斥去家居有後山之勝而任于外未嘗忘也輒
以日號云

浙江布政司右叅政劉公安傳

潘垣

劉公安字志康從高祖母姓乃姓高其先泗州人六
世祖仕宋爲宿州安撫使 聖朝混一之初祖再八
徙居山陽因家焉父楚善公幼警敏過人父曰他日
顯劉氏者必此子也九歲喪父母旣長質貌魁偉舉
止端重嘗撫松楸嘆曰有親而不得養與夫有子而
不能顯揚者同一不孝因肆力於學入郡庠爲弟子
員累舉不第貢入太學宣德癸丑擢知南宮縣慎於
操守勤於撫字教民以樹藝聯士子以進修置義倉
義塚貧有養死有歸北方賢有司莫能或之先也甲

寅夏境內旱蝗率吏民禱三日乃雨蝗亦頓絕是歲鄰邑皆饑惟南宮大熟明年鄰邑復蝗獸不入境又大熟民歌之曰侯宰南宮民和政通蝗不入境會之曾恭頌聲播遠邇時有賊張普祥等號白蓮會河北騷動朝廷索之急公捕其黨仲伍等檢其家得簿書錄妖者姓名吏欲送府窮治之曰不可亟火之全活者幾萬人邑南有李陽水廟碑高丈餘歲久祠頽碑且仆公一日率僚屬祈雨至祠下見碑石甚巨非數百人弗能起告於神曰神如有靈碑自立安當新其祠翌日雷雨大作四野霑足碑且起立公以銀觚

水妖書活

舊人

祝神自

與神就付諸廟中因具其事上聞且請新其祠詔許之召工薙草萊增基址興版築掘地獲錢六十萬緡遂爲修葺之需期月而廟成正統辛酉春公嘒科目久乏人乃割俸資市巨木送學宮語諸生日吾以科目望汝輩不負吾所望者當以此木表其坊是秋白圭鄉薦舉進士歷官學士太子太保兵部尚書遂以所市木立鄉貢進士坊又出俸金厚贈之自是人才輩出科目有人九載秩滿民攀號塞道車不得行旣又詣闕借寇不果留尋被薦陞知杭州府府衝繁難治公處之易易如庖丁解牛未幾陞浙江布政司右

叅政二年病卒年六十有二公有士行有吏才英敏
果寬裕有容其在南宮公與圭有父師造就之恩
在浙幕主與公有僚友交承之誼處之各盡其道而
報之失其情可以爲難矣白圭行狀云

浙江右叅政知台州府周旭鑑傳

費宏

公諱旭鑑廣信貴溪人也姓本丘宋魏國文定公諱
密之裔其先以宦寓于越之丘墩與貴溪周氏爲世
姻公父惟政出爲周氏後因承其姓公生而警敏童
年卽有遠志經史皆通大義甫冠以家貧廢書然志
猶未墜邑令聞其才將辟爲椽公恥事刀筆力辭不
就索之急匿山谷中度勢不容已乃白於令願得從
事邑庠與諸生游於是識日以進永樂丁亥 文皇
帝詔儒臣修大典公用薦者召赴京師入局與其事
書成授迪功郎順德府經歷三年改江寧縣簿未滿

考又以舊代者至還吏部會通政司幕職缺當道薦
公權知經歷司事值車駕北征公從幸督餉以身率
下不避勞瘁飛輓之役如程而辦旣還真拜知事

上以京儲出納弊旁午欲得廉明剛正者蒞之蹇公
義以公應詔公受命深自激勵凡豪猾窟穴倉廩侵
漁公私者悉抵罪竣事還任適南京通政司長貳缺
上以公進退循雅奏對詳明特命公署之宣德元
年以內外艱去歲辛亥服闋入京學士曾公榮侍郎
李公嘉交薦公材任郡守吏侍鄭誠惡公不巳附沮
之浙有邑曰黃巖依山濱海民性兇獷尚告訐俗小

忿動以兵鬪其豪黠者把握官府短長以張勢射利
吏稍與齟齬卽羣起媒孽以法褫職去者接踵廷臣
謂非公莫能治乃以屬公公亦喜以盤錯自見迎者
待界上公已潛入邑中盡得諸豪主名乘其不測以
一日獨坐庭中召諸曹與定約束豪來謁者猶用故
術覘公公叱左右縛請獄當以死惡黨股栗公猶嚴
備之夜寢輒四五徙未數月紀綱設張衆知公不可
動相戒勿犯自是力行政教且爬梳其逸蠹山海寇
出設方略剷除殆盡故廟學毀于颶師生處草屋數
椽撤而新之奏減軍需及風傷田禾度逋稅不能償

者達於監司請代以鈔編戶貲產高下之數悉籍記之遇役則據以差其輕重里正之役必擇間右以充於是賦平徭均逃移復業者十七八以民飲苦鹹而病也乃鑿山引泉入市以便民汲前義士林和嘗割產千畝為縣比利涉橋久為有力者所侵橋廢不葺往來濟以舟遇漲多覆公輒復之疏支渠去壅塞民利沃饒其西鄉山多虎公率丁壯捕之不獲過一祠因與神約厥明虎不獲且焚祠是夜夢神告虎所在如其言往虎皆就戮歲甲寅大旱公禱之越三日大雨稿苗復甦是歲民間麥秀五穗桑生駢枝又有靈

圖

芝及一乳三子之祥邑大夫士因繪四異圖以紀

盛既數年黃巖稱易治頑民感化者或圖公像以表

於家鄰境事不能直者往往赴公愬藩臬以最聞時

三楊先生在柄地急於用賢請于 上陞公台州府

通判階承德郎仍掌黃巖縣事賜璽書有廉潔公勤

撫綏良善芟刈豪強兆民安業之褒公奉勅益感奮

於郡事多所贊決正統甲子台守以事罷闔郡軍民

上章願補公 上特從民請進階中順大夫公蒞政

一如在黃巖時而崇禮教飭信令正已勵下興學舉

賢尤注意焉無幾五邑民格心歸化爭訟滅息盜去

當特 宰相 知急 資如 此

入他境歲已巳處州山寇葉宗留倡亂朝廷命將剿之有勅公督義兵往贊其謀公既行台民皇皇失所恃屢疏請還公治郡公督部屬閱丁壯備器械躬親訓練復據括蒼之險奏置巡檢司增兵防禦于時鄰郡皆騷動獨台晏然郡民歌之是歲嘉禾生郡廩一莖兩穗有三合穎者明年景泰庚午監察御史程昊上公治狀特陞浙江布政司右叅政階亞中大夫仍掌府事時公年幾七十矣亟欲抗疏乞休念初拜寵命不敢遽言其私黽勉政務用圖報稱一旦謁文廟還方蒞事溘然而逝公爲人短軀豐顙秀目疎髯氣

夏多
賢上
大夫

岸高邁性度倜儻所立不肯居古人下存心制行不敢欺居家以孝友聞從子處州守祺諸暨教諭自賴其教以成入史局時卽與賢士大夫遊尚書王正都御史顧佐學士解縉曾榮庶子周述脩撰李時勉檢討陳璉諸先生交最深前台守李性嘗與公互訐事白性被黜徙邊家屬留郡公置舊怨屢加存問將歸爲治行李人益賢公入仕四十年不以家累隨食飲被服與寒峻公其卒也囊無餘貲父老爲治殮具郡人無貴賤老弱莫不悼怛其賢者哭奠盡哀柩行縞素送者數千人今三十餘年矣台人頌公無異

狀教錄

卷之八

卷之八

卷之八

卷之八

辭相率控當道捐費立祠以祀云

論曰余悼叔世不知守令之於民重也年資所及遽以屬之不問其堪與否也間有能其官者又驟遷數易奪民所好而不知卹於是州縣之治益以不古民日瘁本日搖其誰念之公生國家盛時天子明聖勵精圖治而三楊在位以舉賢愛民爲第一義故公自京朝官用薦補黃巖爲守爲藩臣褒遷婁矣然卒不去其舊治民旣安公而公亦習其民治行隱然與渤海潁川相頡頏豈非古今之一快哉又嘗聞之洪武間有瞽林心月者年八十餘寓黃巖之西橋善易數預知吉凶見其邑敝甚嘗爲人言後此五十年有周令者來民始安及公至父老憶其歲月適合豈民之安否亦有數也耶吁亦異已

張叅政穆行狀

黃雲

公諱穆字敬之姓張氏世崑山人也曾祖道昇祖文裕父禮母何氏公之先世居吳淞之橫塘自公之父贅何氏始徙居邑婁上公兄弟四人皆才而仕者三人長積以父命從農業資公等學公年十九中宣德乙卯鄉試正統己未與兄和並登進士會試公名在第二廷試兄名首二甲由是公兄弟文學名隱然動京師傳海內矣兄以疾告歸養公擢工部營繕屯田二司主事繼丁內外艱門人來學者衆公授以經凡得指教者爲文有法後皆登科甲爲名宦間類編先

達遺文以傳十三年服闋改刑部主事公明于法律
行之以敬恕讞議克允而剖決無留滯寃之疑隱得
白者多君子稱其平故尚書侍郎咸異曹郎禮待之
考滿陞署員外郎公雖專刑獄而經學爲衆所推舉
同考景泰甲戌會試公閱卷尚理致畧詞華若鍊金
琢玉必務精良旣撤棘而收名定價于公者皆青雲
器也六年陞郎中階奉政大夫誥贈公考如其官母
妻封宜人天順改元陞山東按察司副使陞辭 英
宗御文華殿諭公等母吐剛茹柔母倚偏縱奸有所
當興罷卽以疏聞仍賜寶楮若干緡以行公感 上

知遇矢心秉政法去貪墨維持公廉戢強遂善一道
肅清其兼理學政士賴甄陶悉就軌範行鄒魯嘗至
泰山凌絕頂覽日觀經梁父探秦漢唐宋封禪之迹
旣而訪孫明復石守道之裔孫流落者復其家歲給
衣食增廣儒學若伯夷閔子孔北海張文忠狄仁傑
祠墓傾圯蕪廢命有司以時修葺爲刻石表志在平
儒學官纂修縣誌收華歆爲人物公以春秋討亂賊
必深絕其黨歆黨漢賊不可以訓惟馬周行事可紀
加罪儒學官斥歆而進周蓋于名教尤拳拳也督糧
儲于遼左悉除去宿弊兵食足而邊警有備暇則登

碣石臨右塞望海天萬里以豁壯懷發諸賦詠寓懷
君戀闕之意歷職山東滿三考成化改元吏部考最
例得正三品以俟闕久二年八月請上命權陞一
資三年陞浙江右叅政清理軍務先是奏者言軍曾
補伍久無明文勾補者恐迷匿失伍例解丁就補而
涉歷阻修多死于道公一以移文行查兵民兩便寧
違例不願也公掌司事考覈諸司官凡評隲才職之
稱否無濫與輕黜焉淳安曹先生公其所取上也曹
墓在萬山中躬往祭之嘉興朱先生冕教諭崑山公
實出門下爲經紀其後久之進表京師今吏部尚書

曹南李八秉稔知公山東之政欲薦公都臺時大
卿王槩謀代李位令給事中蕭彥章劾李不職事彥
章槩之壻也公舊與前威寧伯王越同僚嘗賦詩譏
其奔走權門越銜公甚陰譖于李文達公謂公欲奏
易其壻衍聖公文達弗察也故南京刑部尚書劉公
亦言于葉文莊公曰敬之好直不掩人瑕玷至品量
篇翰亦然故公竟以直致謗文達公與國政公在李
尚書奏中卽解官歸幾無以爲生故吏門生知公素
廉介而能貧相與奉金爲壽始葺先人敝廬買田淞
江之滸而老焉與鄉曲諸縉紳爲會居閑處寂觀書

自適非有疾與赴宴會手不釋卷公厚于倫理先業
以讓其兄仲兄卒官憲副事寡嫂以禮季弟种爲濮
州判官亦卒恤其孤申甫碑勉于學後進有文而制
行之美者必加接引延譽於人人公既歸齊魯之士
入官及卒業胄監領鄉薦者凡經吳郡必至崑拜公
床下博學無所不窺爲文典雅詩清新婉麗有唐諸
才子風一時以業來請者屢相接也所著勿齋集二
十卷藏于家

浙江布政使司右叅政陸公容墓碑

吳寬

公諱容字文量姓陸氏先世冒徐氏至公始復未生
其母夢紫衣人以笏擊其首日當生貴子已而得公
弱歲穎敏篤學游鄉校不專治舉子業日取諸經子
史程誦不輟同輩謂非所急日聊以抵諸君戲耳獨
與故翰林修撰張亨父太常少卿陸鼎儀友善三人
俱以文行聞於鄉而公尤爲葉文莊公所知天順三
年中應天府鄉試成化二年登進士第授南京吏部
驗封司主事丁外艱服除改兵部職方司擢武庫司
員外郎再擢職方司郎中丁內艱服除改武選司遂

陞右叅政致仕卒年五十九公在兵部勤於公事邊報或急奏疏日三四上動輒數千言皆出公手而慮遠持正士論歸之西域賈胡進獅子至陝西嘉峪關奏乞大臣率軍士往迎公言于尚書外夷以奇獸進朝廷旣不能却若復往迎之寧不貽笑天下後世耶議上遂已又安南累歲侵擾隣邦有欲加兵者公言安南臣服中國已久今事大之禮不虧叛逆之形未見一旦以兵加之恐遺禍不細其事亦已錦衣百戶韋瑛凶悍附勢得罪調宣府謀再用指良民爲妖言冀以爲功公言于尚書具疏請下法司鞠之瑛竟坐誅而被誣者十餘人皆獲釋京師稱快先時捕妖者多陞官例得世襲愚民被誣死者無數公請除其例獄遂哀都指揮昌佐求爲金齒騰衝叅將公執不可俄中貴人召公至內諭旨公言西南夷要地必得堪爲將者守禦佐非其人若順成之異日壞事咎將誰執佐計竟沮他日復有中貴人舉都指揮二人爲都督僉事者命已下公益不可言都督大官必積功始得彼何人而欲亂法耶舉者市恩專擅尤宜置之于法以爲後戒疏凡再上言甚切直上從之一時雖曲宥其人而自後犯者必罪著爲令他所建白若

論馬政四事論儲養台輔教導勲戚愛惜人才久任
巡撫經理京衛選練禁兵均平鈔法慎重會議又八
事及在浙江益究察民隱振作士風行縣至桐廬日
嘗發漁家兄弟殺於潛丐者夫婦事人傳以爲神旣
乃條列浙中便宜十事悉見施行間因公務入京又
論漕渠利病語斥權貴有人所不敢言者蓋公少壯
有志天下如兵刑水利之類有所得輒于書之冊後
多見於用云公事父母甚孝父病躬奉湯藥不離左
右嘗夜醉歸母不樂自是飲必半杯不敢至醉其居
喪三年不入室人未嘗見其嘻笑治家嚴肅動容凝
重若不可親狎至與人處歡然也性喜聚書政事之
餘手不釋卷見於著述率明切平實爲詩文若干卷
記錄諸書又若干卷

浙江右叅政楊公奇墓表

王華

公名奇字秀夫別號寒泉父能由鄉進上任東昌知
府母宜人牛氏公穎敏絕人十歲能文有老成語長
老稱爲奇童弱冠名起諸生間成化庚子中鄉舉高
第主司批其文曰筆力可扛龍門百斛鼎錄以爲式
明年辛丑連得進士授戶部河南司主事簡使犒軍
於獨石督鹽於長蘆受芻於京場選婚於圻內廉公
平簡後先一軌弘治改元上裕國安民疏甚剴切未
幾奉勅處置居庸紫荆諸關軍餉公復上疏極言足
食足兵之法在端本澄源而減冗除蠹理不可緩語

侵貴近識者憇之癸丑進四川司員外郎連有淮揚
督漕九江造冊河南視災之使其建聲蹟甲寅進陝
西司郎中時奉勅整督甘肅軍餉將行上疏言備邊
七事 上嘉納之至則今太宰許公以都御史撫其
地與公同事許公素器公於是益重焉事竣還朝有
白金文縞之賜以才任劇調雲南司是司兼順天奸
悍者傍窺不敢犯尋以薦擢守嘉興改夔州夔在四
川地僻民靡公爲書諭之俾敦孝友尚經義延問父
老民所苦與所利卽罷行之新廟學之制月朔視學
進弟子問業有師道焉人士感慕其諸壇宇官署支
頽完毀百廢具興民飲江水遠汲爲艱公議鑿井出
郡門數尺卽得美泉民以公姓目之屬大寧縣鹽井
在萬山中距邑治三十里道阻於險小舟入溪夏漲
則往往溺死民多饑殍公鑿山爲道得任負往來民
甚便之夔吏多盜篆移屬以圖賄公置籍付諸邑俾
驗而行宿弊遂息在任五年人士感慕至爲公作生
祠貌公而尸祝之擢兩浙鹽運使剔弊講利績效方
懋前太宰馬公以浙事簡未足盡公改兩淮公以浙
治治之升鹽賦五十餘萬司治舊在揚城東淺隘艱
守公乃崇墉固藏益防卒奸無虞焉明年擢叅浙政

獻徵錄 卷之八十四
將有施設而乃止是知公者重惜之以正德丁卯十一月七日卒爲春秋五十有四

浙江布政使司右叅政陸公鰲墓志銘周用

公諱鰲字鎮卿一字騰霄姓陸氏蘇之吳江人考祥介而好義累贈中憲大夫浙江温州府知府母龐氏累封大恭人公少從中憲役於京師遭家坎壈世業日湮弘治初中憲卒公侍太恭人以居稍長就學中弘治乙卯順天鄉試壬戌第進士授湖廣荊州府推官廉勤明允人以不寃知府雅不善視同僚顧獨信愛公事必相可否然後行會給事中御史使楚檄公閱錢穀施州施州民雜夷獠不可責以法久矣公曰茲非有官者之事乎卽日以往剗絕宿弊猶日治其

滯訟比去軍民咸以爲此公於我有恩攝府事一年
几無留牘歲當慮囚卽市曹白巡按御史爲之停刑
者六人具得申雪累以上官命決疑獄諸郡三年陞
工部都水司主事管徐百步洪省夫役錢築石隄以
便引船凡幾千丈正德間逆瑾方專橫政特苛黷同
年給事中按事淮安府事訖而返道及於徐自經于
舟中知府誣公知其由以自解公徐曰事固不可以
僞爲也不爲辯事聞驗之卒無實會御史缺改福建
道監察御史督京師東路盜賊明年巡山海關遂劾
巡撫都御史之不職者因疏籌邊三事悉見采納繼

陳六事不報巡按河南鎮守太監王某公至戒其下
曰陸御史來矣旣至奪宣武等衛屯田爲勢家所據
者六十餘頃給諸貧軍歲增糧四萬石正德六年以
來北方流賊所在蠶起有司得所脅從輒坐以死而
犯者益衆公盡釋之仍令官府勿聽以他事相攻訐
者於是人情大安奏釋各府滯獄百數人辯死刑之
誣者六十人監河南鄉試河南稱近科得人以是年
爲盛明年擢知温州府始至民多訟公曰所以致訟
者由求簡訟之速爾夫長民者一切不問民則何以
輸其情乃蚤夜聽斷不爲懈暮月視始至殆損訟牒

什六七器辯者稍稍就田畝吏俛首受成無所緣以爲姦乃廣學舍爲諸生講解程課試藝鹿城書院第以高下彬彬成材台處寧紹歲饑流亡集府之境內爲給粥仰以活者無慮千數裁省鄉飲祭祀公事外諸無名冗費民困大紓温州瀕海阻山絕商販荒政廢不講公令願贖罪以穀者聽三年穀且盈八萬豪民徐姓專持有司短長民以爲害前官莫敢問公召寘之法民間生女輒不舉公嚴設禁諭婚姻第各稱其家俗以一變甃府城三千丈覆以石省歲所費不貲又闢通衢臨鴈池以息火患其餘事事規畫莫不

長久可行御史每行郡至溫一宿輒起曰溫州殆無所事在溫州六年陞浙江布政司石叅政督糧儲是時浙之東西素狎公之政不煩而集初布政司以金循嚴處四府歲凶議減盤石衛糧價輸之溫州府庫者比其出納也或謂官府操其贏軍中以爲信至是風聞言官論其事公方行縣卽日歸吳江巡按御史數使人輒還公歎曰鴻飛冥冥弋人何慕焉竟不可彊公早孤羈旅於京師奮志學問一時所與交游皆以文章知名往往先後登顯仕故公起家郎署至方面人稱資於師友者爲多性坦易不立崖岸復慷慨

重節義敷歷中外二十年足迹不一及權門其爲推
官時有李都御史謫戍邊路出荊州時禁方嚴公與
無一面就逆旅慰籍備至遺之俸二十金以行其在
河南奏祠正德間死事上蔡知縣霍恩等五人溫州
江心寺故有宋文山祠歲久而圯葺而擴之居常每
以中憲不及祿養爲恨事太恭人曲盡孝敬居喪以
禮與其配畢恭人相待如賓白首無間言諸子業經
學懶懈教以忠孝勤儉自浙中歸始治世業不事侈
靡亦不爲矯飾自號釣雪散人約諸士大夫爲會作
堂曰半閒扁榻所曰勗齋以見素志家居越十五年
是爲嘉靖丙申七月十一日公燕客客去沐浴已述
寢遽呼諸子環視之無所語翹然而逝年六十有四

浙江布政司叅議徐君瑤墓志銘

嚴嵩

君姓徐氏諱瑤信之其字也十歲能屬文倪文僖公一見奇之謂其叔祖助教公曰徐氏有子矣受叔父僉憲公訓學益進弘治庚戌登進士第觀政戶部嘗攝監收倉粟能革諸弊給賞遼東官軍被檄輿疾不以勸辭授知華容縣屬歲歉寬禁緩責勞徠賑卹全活甚衆縣有黃洋渡雨潦時至冒其旁田溢爲巨浸君問知其弊乃發卒築隄延數百丈仍歲大熟民則歌呼曰德我者徐公乎由是相與名曰徐公隄云均編籍之役置平糴倉治狀稱最入爲南京戶部主事

改工部分司儀真丁母憂服除補南京刑部陞員外郎郎中君治職勤敏奮欲有爲操憲任法里中舊故請謁拒閉強明自信者也然擢貳浙藩未幾輒告罷嗚呼遇合興廢不可違於命蓋久矣況持獨特難合之見以居羣觀儔訾之地雖慎履矜行猶難之世嘗謂君爲同列所中傷或置懟愠其間豈知命之謂哉君去官家居益貧然不以屑意時集名雋彈碁賦詩曠衍竟日未卒數日猶然忽告君被疾遽歿遠近歎息咨閔焉其卒之日嘉靖三年四月某日也距生景泰庚午年七十有五徐氏蘇人入國初爲江寧人君善於爲文尤喜作歌詩所存有石林稿若干卷大率建安揚公謂嵩曰信之吾同年友也于浙又嘗爲僚信之直厚而簡易不爲城府交久能敬仕而才惜弗究其施也其卒吾無以慰其孤惟葬有石將子是託焉明日諸孤奉通政叅議黎君狀以至申公命乃作銘曰車堅御良周道孔夷孰遏孰擠而蹶其馳嗟乎徐君委順何尤太宰篤舊予闡厥幽

浙江叅議符公觀墓志銘

嚴嵩

公少刻厲讀書寄食城北浮屠足不踰戶閩數年學
藝大進以禮經占弘治乙酉江西鄉試明年舉進士
南省第五人選知溧陽縣法古爲政諭民重禮敦俗
督勞農田濬築陂渠瀦洩以時旱潦有備鉏止豪右
屢察疑獄脫數人於死徭役編審有法吏不得爲姦
修學舍祠名宦鄉賢立貞女廟作義阡遷葬八十餘
塚溧人鐫石頌焉陞高州同知丁父憂服除補辰州
改作黔江淑浦二學以乘山川之秀召吏民子弟親
爲講說誘勸以文藝學者日起正德己巳擢爲廣西

按察僉事分巡左江會藍賊構亂一日謀報賊衆分
攻平南貴桂三邑公卽督兵馳至平南江伺賊半渡
擊之斫其渠魁中流渰沒不計其數自始發兵及後
賊所以破滅皆如公計衆謂公儒者料敵制勝乃爾
潯衛將有與卒訟田而久不決以危言脅公不爲動
竟質平馬潯民奏田少稅多期得減賦公曰必使田
浮則欺上必使稅浮則損下當驗實使田賦兩平耳
已而田果不少衆帖服公乘險阻冒瘴癘經畧勤勤
旣陞浙江叅議旋改山東皆不往請老而歸蓋公所
爲政志在便民有所建置期必行雖忤上官意不少

恤不能効世飭厨傳將迎所至有聲蹟而貴勢多不
合以此淹久無助處之裕如也公不苟取予在溧陽
於廨後得古藏銀悉易穀以賑貧民居家盈縮無所
問家人時以匱告徐曰若等自經理之可矣杜門十
有八年足跡不一至城府提學使者請主白鹿書院
亦以疾辭朔望謁先祠坐堂上率家衆道古今孝友
節義定規約數十事俾世守之公於書無所不觀自
經史子集至於天文星曆地理醫卜罔不研究手自
鈔錄垂老不輟其於學大有得也所著有活溪存稿
若干卷選唐宋元國朝近體詩歐蘇文選醫家纂要

地理集奇諸書藏于家公諱觀字衍觀學者稱爲活
溪先生姓符氏世家新喻之金田祖諱剛考諱勤皆
鄉里長者考以公故贈溧陽知縣公生正統甲子享
八十有五

浙江提刑按察使王良傳

忠節錄

王良字天性河南祥符人歷官刑部左侍郎建文中
坐問燕國人罪輕左遷浙江按察使至浙謁岳鄂王
墓誓曰苟媿武穆非人也壬午聞靖難師克誓以必
死慟哭不已會命使召良良執使者將斬以狗爲衆
劫去良乃集諸司印凡九攜歸私第嗟嘆者久之妻
問故良曰吾分應死顧思所以處汝未決耳妻曰我
何難君爲男子乃爲婦人謀乎遂命妾饋良食抱其
子歛歔如廁置子池傍自投池死良久往覓之子匍
匐池畔頃之屍浮起良殮殮畢卽列薪於戶寫遺囑

付家人令妾抱幼子往匿某僉事家以宗祀為托或
 曰托諸汴商遂舉火抱印闔室同赴火死事聞 文
 皇曰死自其分朝廷印信良擅毀不得無罪詔徙其
 家于邊已而風雨晦冥人或見其出沒台人陳璘私
 識良死事每談及流涕沾襟正德間按察使梁材提
 學副使劉瑞改公署東水鑑亭為祠祀良

周志新傳

黃佐

周志新字日新南海人 文皇帝嘗呼為周新因以
 焉而以志新為字洪武己卯舉于鄉筮仕大理寺評
 事每有疑獄一言而白壬午拜監察御史彈劾敢言
 貴戚畏之目為冷面寒鐵人因稱為冷面寒鐵公京
 師中或怖小兒輒曰冷面寒鐵公來皆匿去永樂元
 年巡按福建奏言朝廷設立軍民諸司彼此相頡頏
 兩非統屬今都司所轄各衛每府官適門或遇諸途
 輒怒府官不下馬甚至鞭辱僕隸衛所公務徑行有
 司理辦稍不從即呵責吏典請自今府衛相見行平

公面寒鐵

禮遇諸途則分道而行所有公務不許徑行府縣有司官吏毋得凌辱遇 聖節正旦冬至在外衛官悉于府治行禮開讀詔書雖邊海衛所亦從布政司差人都司毋與 上悉從之二年巡按北京時制令所屬吏民有犯徒流者免罪就發北京民稀處種田監候詳擬往復數月多死獄中新奏請今後死罪及職官有犯詳擬待報其吏民犯徒流者悉從北京行部或巡按詳允就發種田如此則下無淹滯之患上不負寬恤之恩 上諭都察院官曰御史言是也且命北京百姓有犯應決者許其收贖燕民大悅三年九月擢雲南按察使未赴有旨改浙江有冤民淹繫月知喜曰冷面寒鐵公來也吾無患矣至卽洗其冤放之自是異政日著一日視篆忽旋風吹異葉至前左右言城中無此木獨一僧寺有之去城差遠新悟曰此必寺僧殺人埋其下也冤魂報我矣發之得婦人屍人稱爲神明一巨商遠回未抵家而日暮恐孤行爲人所圖潛以其貲置一祠石下至家妻問之告以故明日求之無有也往訴之新新曰是必而妻有外遇也覆之果然蓋歸語妻時搜之者竊聽先往取之矣遂併治之有訴爭雨傘者甲曰我傘也乙曰我傘

也彼奪之所言記驗皆同新命剖之各持其半去陰遣人尾其後甲曰我始欲助汝傘價之半得非汝利也乙答曰傘本我物寧能低價屬汝于是甲就縛正其罪其燭奸類此境中有虎害為文告於城隍神須臾得虎格殺之初往浙道上蠅蚋迎馬而聚尾之見一暴屍惟小木布印及至任令人市布得印誌同者鞫之乃劫布商賊也悉以其贓召布商家給之家人大驚始知其死于賊也人皆服之其除暴類此會夏秋潦窪田盡沒永樂九年湖州府無徵糧米十七萬二千四百餘石所司一槩催徵民日逃亡奏乞遣官

覆驗

上卽命戶部覈實蠲免嘗巡屬縣徵服觸

官收繫獄中與囚語遂知一縣疾苦明日往迓乃自獄出縣官恐懼伏謝竟以罪去由是諸郡邑吏聞風股栗莫敢恣肆錢塘知縣葉宗行號廉能嘗偵之入其居無長物惟笠澤魚腊一束其家所寄也袖少許以出明日召飲出示葉葉益砥礪號錢塘一葉清後卒于任為文往祭哭之甚哀其旌別淑慝類此寮案一日餽以鷲炙懸于室後有遺者指示之新未顯時其妻治女紅以給及同官內燕荆釵布裙以往大類田野婦各相慚慙更為澹素當是時周憲使之名震

錢塘
一葉
清

天下澤及無告民自不寃雖三尺童子皆頌其美焉
初錦衣衛指揮紀綱用事使千戶往浙緝事多作威
福受吏賂新時進須知如京師遇諸涿州捕繫之千
戶脫走訴于綱綱乃更誣奏新 上怒令馳馬逮新
承綱意者榜掠無完膚既至伏陛前猶抗聲曰按察
司行事與在內都察院同 陛下所詔也臣奉詔擒
奸惡柰何罪臣臣死且不憾 上愈怒命戮之臨刑
大呼曰生爲直臣死當作直鬼他日顧問侍臣曰周
新何許人對曰廣東 上嘆曰廣東乃有此好人耶
枉殺之矣後紀綱以罪誅事益白新既不祿其妻獨

挈遺衣及書數卷歸廣東貧居如洗都御史楊信
巡撫時存問其家周以月俸嘗語人周志新當代第
一人吾黨所未及也新無子景泰初其妻卒于家漸
人在廣東藩臬者皆會葬云論曰嗚呼新之死于紀
綱也可哀也哉持身之廉臨政之明辨寃澤物之仁
與夫持風裁臨患難之直而不撓可謂剛且大者語
曰直木先伐又曰物忌芳潔其新之謂歟同里彭森
傳其行曰公發奸擿伏有廣漢風而宋有鐵面御史
公似過之擬人于其倫矣又曰被刑之夕司天奏文
星墜 上以是悔自後見一人衣紅立日中呵之問

爲誰曰臣周新也上帝以臣剛直命爲城隍爲
陛
下治奸臣貪吏言已不見天顏撫然嗚呼豈其然乎
豈亦鄭伯有魏元微之比乎近世劉球毛吉爲奸盜
所殺嘗附魂于人傳者亦著其說夫何疑于新乎要
之新之清風勁節固不待此而自可傳于不泯也

浙江按察使陳公璇傳

魏驥

昔人之論士必曰先器識而後文藝是知士於器識
文藝皆不可無其曰先器識而後文藝者豈不以器
識爲本文藝爲末乎抑豈不以得文藝器識兼備之
士之爲美乎觀今浙江按察使鳳陽陳公之所存可
不謂之器識文藝之士乎公名璇字 其先江陰
宦族洪武中以祖某資產甲於編戶徙實鳳陽子孫
遂爲鳳陽人兄弟十人皆俊偉傑特公天資尤穎異
甫冠充郡庠弟子員蚤夜孜孜篤志於學不煩師資
而日進之業倍人嘗與同輩曰吾輩爲學當思不止

於掇科可也苟惟圖此以進身而不思其遠者大者豈足以報朝廷之作養乎迨登進士第拜監察御史凜乎風裁不察察而明不沒沒而暗知者以爲得風憲體時從兄耘字德耕亦爲御史其學問不在公下與予相友善間謂予曰某性褊迫終不若吾弟之雍容寬裕喜怒不形他日遠到吾必不若也嗣後公果膺叙遷陞雲南按察僉事一日鎮守雲南都督沐公訪予吏部公讀書善談論於人不輕許可予因詢方面中當其意者凡幾人公曰無如憲僉陳某其人予復詰之曰何以知其爲人公曰陳未嘗倚法以凌人亦未嘗廢法以貸人吾以是知之迨陞浙江憲使浙江地大事繁爲憲使者百責所萃每難其人公自下車凜冰玉之操不動聲色於所設施間不容髮寬不縱猛不殘欲究其見於行事者殆不可以偃數方面肅清俾浙人無間遠邇靡不向風而懷德咸曰良憲使良憲使已逮書考都憲者謂公少擊搏風公曰法貴禁人不犯不從禁而罹於法某亦何嘗少貸邪卒以公言達大體旣旋軫值考察者於公頗不協公卽日啓行赴闕聽進止而浙之軍民咸動容蹙頗如失父母者不啻數千人填衢塞巷率悵悵以挽留之至

馬不能前公不得已姑暫駐於城之宗陽宮一宿黎明取間道而去孰意其耆老李恒等視公又先抵京陳公之政蹟近臣亦以得民心爲言由是朝廷仍令公還視事且公於進退喜愠尤無幾微見顏面故識者謂公之量誠非沾沾小智之比又如此也惟公平生內貞外和學修行篤故於臨政雍容自若不銜不矜其心惟在於正人心厚風俗爲要於是自始至終一以德意臨人不鈞距以求情不玩弄以壞法稍暇則游心經史寄興詞翰以適其所適而已噫器識旣備文藝亦修非公其人而何

浙江按察司按察使楊公瑄墓志銘 楊守陳

天順初 英廟復辟時廣西道監察御史楊公印馬于畿內民羣訴太監吉祥忠國公石亨奪其田若干頃公具以聞併言其怙寵擅權之罪詔稱公敢言稱職命吏部記之蓋將以大任也旣而還京彗孛連見祥亨二凶日益張十三道御史謀劾之有私泄於亨者亨與祥合謀上譖暨彈章入 上震怒召諸御史詣文華殿俾譖彈章而歷詰之御史周斌與公輩且誦且對歷陳二凶罪狀明甚然 天意入先譖莫能回悉下錦衣衛獄逼公誣引大臣刑甚慘酷數瀕死

卒無一語他及有司文致坐公死而十三道長皆坐
戍餘多坐貶奏上矣會京城大風雹拔木壞屋走正
陽門下馬牌於郊外於是獄皆從減死者戍戍者貶
貶者復而公就戍遼東之鐵嶺道遇赦還或謂公宜
詣二凶謝庶免後禍公不可復謫戍廣西之南丹居
五歲二凶相繼以逆誅公被特旨還里居今 上嗣
位以言官奏復公舊官改陝西道尋陞浙江按察副
使居父憂起復舊治巡海後陞按察使卒于官自古
亂臣逆黨必先淫刑重法以箝羣衆之口而懾服其
心俾莫敢不從然後得逞其志此二凶所以必欲寘

公死也既而公幸生全二凶卒誅滅而公乃復于位
豈非天哉公姓楊諱瑄字廷獻南昌豐城縣人其始
祖曰王君權唐季相南平王累官金紫光祿大夫居
南昌之武寧傳十有五葉至公曾祖回仲猶王姓國
初徙豐城占籍始訛爲楊蓋方言王楊無異音故也
公祖名高不仕父子榮以鄉舉累官蜀府左長史母
周氏公以甲戌進士爲御史僅兩朞而罹二凶之禍
再起爲御史歲餘遂副憲于浙杭州衛指揮陳鼎父
子肆凶惡海寧民管箠沈琦工詆誣皆莫敢誰何公
悉寘之法屬府造上供紙歲若干萬工估價每番銀

一兩公計量纖悉減十之九歲省銀若干萬兩民德
之其巡海道以軍官多放戍卒嚴禁之立五日一操
點之法以邊餉太糶而屢空爲革勢豪攬糧之弊奏
增一通判專理以武臣多不學爲葺學延師教其子
弟凡城隍墩墩廨署舸艦甲兵皆以次繕葺之無遺
力加定海之城北捍海塘縣西走馬堤鄞衢所之裏
外海塘健跳所之海塘海鹽縣之大海塘皆修築之
以奠邑居以興民利而海鹽塘踰二千三百丈工尤
鉅禦患尤大非公莫能爲也在杭州以按察司卑隘
逼塞廼撤舊宇改創數百楹穹鉅偉麗闢其前衢廓

然四達以西湖舊深廣能漑諸邑田至十六萬頃
堙過半奏請浚深之如舊於湧金門北闢水門放湖
流入城河出清湖閘抵海寧黃灣以漑十六萬頃田
復於畏吾寺前後建三橋以通水門俾小舟常入湖
取泥以濬深可久不堙功雖未就慮則深遠矣公巡
海數歲波恬烽息成化丁酉春忽報倭船數百犯邊
公時在杭寮案驚問公徐曰彼果來犯吾將盡誅之
乃出巡至寧波府衛已戒嚴守令呼民壯授甲林立
矣公謂曰海上甲兵自足內地不須虞安用民壯今
農事方殷亟散之至定海數日乃知倭僅兩船入貢

耳於是皆服公之智量其爲按察使以憲度久弛力振之嚴門禁察吏奸斷訟明敏無留獄禁官署毋桑蠶爭民利諸婦女毋入寺觀以隳風俗甫半載而病亟寮案往問尚與論築海塘之法浚西湖之利無片言及私成化戊戌七月朔日卒年纔五十有四耳公疏爽有志節喜建功業而才足以勝之視天下事無不可爲者然賦命不永而止此惜哉余修史至天順間二凶事爲之慟哭流涕而不能已也嗚呼正統之末社稷非景帝莫可保而一時竭忠殫勞者皆可謂社稷臣也二凶于是時亦受恩不貲貴富極矣

而忠勞蔑如逮景泰末誠所謂惠懷無親者矣天下非英廟其誰歸而二凶者貪天之功弁髦景帝魚肉其社稷之臣殆盡此余所爲慟哭流涕而不能已也嗚呼二凶是舉豈直要功以固位而已哉蓋以圖改玉之兆也於是勢熾炎天孰敢一睚眦之而公露章顯斥濱死而不易辭可謂忠謹之臣矣曾不數年而二凶者身刑家戮遺臭無疆而公乃高陟令終流譽千載豈直薰蕕之辨而已哉嗚呼使二凶不自作孽則國家無釁而其貴富延及于來胤未已公非以忠謹著則雖有他表見豈能若今之焯焯後世決

不可泯如此哉是亦足爲萬世人臣之鑒矣

浙江按察使王公之猷墓志銘

馮琦

公諱之猷字爾嘉其先瑯琊人自始祖貴徙居新城遂爲新城人貴生伍伍生教授麟麟生太僕公重光當世宗時建三殿太僕公督木於黔出入谿洞崎嶇迫阨間卒於事天子憫其勞賜祭贈官有加焉太僕公娶劉太淑人生公兄弟六人長封左方伯之翰次司農卿之垣次員外郎之輔次郡守之城次卽公少於公者貢生之棟公生偉姿儀神情開美見者器重之庚午舉於鄉丁丑舉進士授平陽司理至卽覆仇獄辨誣獄釋其以微訾煨煉成獄者人不敢干

以私有裨將某受取狼籍懼公奉金幣爲壽以嘗公
公正色發其貪狀致之法於是郡中廩廩懾公奏最
擢禮曹郎有蜀藩爲假印文以請封衆莫辨公熟視
曰贗證之故牘果然於是條上藩封議十二著爲令
天子念鳳陽湯沐邑江淮咽喉重地值大侵民羣
起嘯聚爲盜擢公爲觀察副使備兵潁州公議賑議
施粥議平糶皆有法民於是相戒不爲盜而獨戮其
渠魁數十人江以北爲患莫如河築隄疏壅歲靡費
度支水衡錢數十萬自河決范口嚙雙溝滄泗城
祖陵幾成巨浸河使者更舉以屬公公遍歷水濱望

形勢從上遊緩縣湍使得滌洄而下不至溯瀉爲隄
患功成 天子賜帑金紀錄晉浙江叅政將行父老
相率泣轅下願得再借王公當事者特疏請得借公
公乃復蒞潁已而太淑人訃至卽日就道民旣不能
長有公則相率尸祝之蓋公歸而二年乙未長子象
恒舉進士公起守河北河北濟源接太行連王屋盜
藪也加以採權令下人情洶洶有異心公以三郡無
兵卒有變何以支乃留宣薊班軍之半以衛河北益
募民間健士銳卒五千人而河北始有兵稽屯田之
侵沒者餉兵而河北兵始有餉冬無雪春無雨河北

之民困公爲條行十二事歲不爲災公入賀 天子
念治江北功擢觀察使鎮維揚是時詔璫之使四出
公至力與璫爭減稅之半璫實銜公故以稅貲貯外
署而索防兵曰如有失官任之公與之數十卒而密
授卒指卒竟不爲璫用璫竟罷之興化民金勝等坐
稅事迂璫璫怒令某驛丞逮勝等公禁丞勿與卽又
怒欲逮丞公又不與丞是時稅使勢張甚郡國守令
監司就吏訊者數矣於是人人爲公危而璫卒憚公
不敢發蓋公爲人居常悃悃不事粉飾其所至惟實
政政務便民至節義所關則奮不顧身有烈丈夫之

槩方其爲禮曹時主事盧洪春以直諫杖于廷 上
遣小璫視誰與盧主事語者同舍郎稍稍引去公獨
與周旋而後借盧出在潁州盱眙令不善爲諛觸直
指使者直指使者欲因事傾之公抗言令無罪令卒
賴以全治河北親藩或魚服以遊公上書諍之書凡
五上王亦寤其正直不阿類如此在淮揚以狼山濱
海要地每以片帆巡行西抵江東入海勞瘁甚而公
不知也會淑人病病不起公遂上書乞歸 天子惜
公才特予歸攝病痊召用公乃舟次淮揚終矣吁差
傷哉人謂太僕公勤王事卒於官公亦勤王事卒于

官太僕公卒有公在側綱紀其喪無遺憾公卒山周
諸君在側亦綱紀其喪無遺憾世稱王氏世家非以
纓組其爲臣忠爲子孝蓋若弓冶云



